




ILIDŽA

INFORMATIVNI BILTEN OPĆINE ILIDŽA
Ilidža • Decembar 2015 • Broj 144





REDOVNA SJEDNICA OPĆINSKOG VIJEĆA

Budžet 23.300.000 KM

Općinsko vijeće Ilidža je na 34. sjednici održanoj 30. decembra 2015. godine u Multifunkcionalnoj sali Općine sa 23 za i tri protiv glasa usvojilo Budžet sa amandmanima u iznosu 23.330.000 KM kao i Prijedlog odluke o izvršenju Budžeta za 2016. godinu. Prema riječima načelnika Općine Ilidža prof. dr. Senaida Memića budžet je socijalno-stabilizirajući i najveći dio sredstava se odnosi na kapitalne projekte. Budžetom je predviđeno, između ostalog, za kapitalne transfere MZ i zdravstvo iznos 6.103.427,06 KM, tekuće transfere MZ 500.000 KM, obrazovanje 352.000 KM, stipendije 400.000 KM, 230.900 za kulturu, vjerske objekte 250.000, izdvajanja za invalidna lica 80.000, za vojne invalide 135.000, raseljena lica 148.000, novčane pomoći 320.000, za sport 320.000, udruženja građana 829.100, te za podršku i podsticaj poljoprivredi i turizmu 300.000 KM.

Usvojen Akcioni plan za realizaciju Strategije razvoja

Vijeće je na posljednjoj sjednici usvojilo i Prijedlog Akcionog plana za realizaciju Strategije razvoja Općine Ilidža za 2016. godinu. Na osnovu Strategije razvoja Općine Ilidža 2014- 2020. godina izradit će se strateški plan za naredne tri godine i posebno Akcioni plan za 2017. godinu do 30. septembra 2016. godine na osnovu čega će se izraditi Nacrt, odnosno Prijedlog Budžeta Općine Ilidža za 2017. godinu. Načelo održivosti zasniva se na ideji da prirodni i ljudski sistemi moraju biti regenerativni, održivi i uravnoteženi da bi trajali. Akcioni Plan sadrži listu prioritarnih projekata, čija realizacija otpočinje u prvoj godini i provedbe strategije sažeto navodi elemente važne za planiranje i praćenje njihove implementacije: doprinos odgovarajućim ciljevima, očekivani učinci na ciljne grupe, te između ostalog, pravilno planiranje troškova i izvora finansiranja predviđenih projekata i njihovo provođenje.



Stipendije za 127 učenika i studenata slabijeg imovnog stanja i 39 bez roditeljskog staranja

Na dnevnom redu 34. redovne sjednice Općinskog vijeća bio i Prijedlog Odluke o stipendiranju djece bez oba roditelja i djece bez roditeljskog staranja u školskoj 2015/2016. godini. Ovom odlukom stipendirat će se 39, i to 19 studenata, 10 učenika srednje škole i 10 osnovaca. Vijeće je donijelo i odluku o stipendiranju 127 učenika i studenta slabijeg imovnog stanja. Odlukom će se stipendirati 50 studenata i 77 učenika. Odlukom o stipendiranju djece bez oba roditelja odobrena su sredstva iz Budžeta i to učenicima po 75 KM mjesečno, a 100

KM redovnim studentima. Isplata će se vršiti od 1.10.2015. godine do 30.09.2016. godine. Stipendije se dodjeljuju djeci bez oba roditelja, kao i djeci bez roditeljskog staranja koja imaju prebivališta i boravak na području općine Ilidža, koja redovno pohađaju školu, a najduže do navršene 27 godine života. Kad je riječ o stipendiji za učenike i studente slabijeg imovnog stanja, mjesečni iznos stipendije je 75 KM, a za studente 100 KM. Stipendije će se dodjeljivati 10 mjeseci. Sredstva dodjeljena stipendijom se ne vraćaju.



Informacija o uspjehu u učenju i vladanju učenika osnovnih i srednjih škola

Programom rada Općinskog vijeća Ilidža za 2015. godinu za period oktobar/decembar planirano je razmatranje Informacija o uspjehu u učenju i vladanju učenika osnovnih i srednjih škola na području općine Ilidža u školskoj 2014/2015. godini. Informacija je rađena na temelju izvještaja o realizaciji godišnjih programa rada škola za školsku 2014/2015. godinu i godišnjih programa rada škola za školsku 2015/2016. godinu. U deset javnih ustanova osnovnih škola na području općine Ilidža u školskoj 2014/2015. godini nastavu je pohađalo 5.623 učenika u 255 odjeljenja, što je za 54 učenika i četiri odjeljenja manje u odnosu na prethodnu školsku godinu, a u odnosu na upisanu školsku 2015/2016. godinu (5625 učenika) više za dva učenika u 250 odjeljenja. Osnovnu muzičku školu Ilidža upisalo je 328 učenika u 29 odjeljenja, a završilo 309 učenika, dok se u toku školske godine iz škole ispisalo 49 učenika. Prosječna ocjena općeg uspjeha, u odnosu na prošlu školsku godinu, je neznatno veća i u ovoj školskoj godini iznosila je 4,38. Procenat učenika sa primjernim vladanjem na nivou općine Ilidža u deset osnovnih škola javnih ustanova je 97,10 posto, vrlo dobrim 1,75, dobrim 0,83, zadovoljavajućim 0,10 lošim 0,10 posto, te neocijenjenih 0,12 posto. U stanju socijalne potrebe su porodice 478 učenika, mada se smatra da je ovo minimum učenika koji su iskazali materijalni status i da je većina ostalih bliža nekoj donjoj egzistencijalnoj granici, nego sredini, navodi se u Informaciji. U Četvrtoj gimnaziji Ilidža školske 2014/2015. godine nastavu je pohađalo 461 učenik u 22 odjeljenja. Srednja ocjena je 4,20, a prolaznost 99,10 posto. Dva učenika II i jedan učenik I razreda nisu uspješno položili popravni ispit i upućeni su da ponove razred. Srednja ocjena općeg uspjeha na maturskom ispitu bila je 4,69. U školskoj 2015/2016. godini upisano je 405 učenika. U Srednjoj tehničkoj školi grafičkih tehnologija, dizajna i multimedije Ilidža školske 2014/2015. godine nastavu je pohađalo 556 učenika u 21 odjeljenje. U školskoj 2015/2016. godini upisano je 472 učenika.



Informacija o stanju i aktivnostima u oblasti rada sa mladima, sporta i kulture

Kreiranje i razvoj omladinske politike Općine Ilidža temelji se na Zakonu o mladima Federacije Bosne i Hercegovine te preporukama relevantnih evropskih dokumenata (Evropska povelja Vijeća Evrope o učešću mladih u životu lokalne zajednice, Bijela knjiga Evropske komisije, 11 indikatora omladinske politike Savjeta Evrope i Evropskog omladinskog foruma) i Rezolucije o mladima u BiH koji obuhvataju 12 osnovnih elemenata omladinske politike. Budžetom Općine Ilidža za 2015. godinu planirana je posebna budžetska linija namijenjena mladima-Budžet za mlade (kao posebna budžetska stavka postoji od 2006. godine) koja u 2015. godini iznosi 70.000,00 KM. Općina Ilidža, u sklopu svojih mogućnosti, podržavala je određene projekte institucija, ustanova i nevladinih organizacija iz oblasti kulture To, bez sumnje, stvara dobre pretpostavke za okupljanje djece i omladine i njihovu energiju usmjerava ka razvoju pozitivnih karakternih osobina i psihički zdrave ličnosti.

Informacija o ugroženosti teritorije općine Ilidža od NUS-a MES-a

U obavljanju poslova zaštite od NUS-a i MES-a Služba civilne zaštite Općine Ilidža, u okviru svoje nadležnosti, primjenjuje Zakon o deminiranju u Bosni i Hercegovini i Zakon o zaštiti i spašavanju ljudi i materijalnih dobara od prirodnih i drugih nesreća. Na području naše općine još uvijek ima puno rizičnih površina i trebat će uložiti mnogo truda i sredstava da bi se ovaj problem riješio. Izuzetnim zalaganjem i radom rukovodstva BH MAC-a i Regionalnog ureda Sarajevo, izviđača, informatora sa terena i radnika Službe civilne zaštite proglašeno je ukupno bez rizika oko 7.800 000 m², novčano izraženo 19.500 000,00 KM. Na području općine Ilidža za deminiranje ostaje još 4.672.000 m² za šta je potrebno obezbjediti oko 12.500.000,00 KM. Na području općine Ilidža ima još lokaliteta koji nisu obrađeni (izviđani). Projekti koji nisu završeni u 2015. godini a početi će u 2016. godini su: Gradina - tehničko izviđanje, površine 65.568,00 m², Poljice - tehničko izviđanje, površine 70.516,00 m², Vrelo Bosne-Golo brdo - tehničko izviđanje, površine 66.093,00 m². Za ove projekte sredstva su obezbjedili Općina Ilidža 200.000,00 KM i Međunarodni fond ITF Slovenija 50.000,00 KM.

Služba civilne zaštite će i u narednom periodu težiti da još bolje i kvalitetnije pristupi ovoj problematici kako bi se nastavio uspješan proces deminiranja na području općine Ilidža.



Ilidža tehnološki, obrazovni i turistički centar primjer u svijetu



Načelnik Općine Ilidža prof.dr. Senaid Memić uspješnom je ocijenio rad uprave i općinske administracije u 2015. godini i najavio niz značajnih investicijskih projekata koji bi ovu lokalnu samoupravu, koja je trenutno četvrta po razvoju u Federaciji BiH, trebali dovesti na vrh tabele najboljih općina. Načelnik je naglasio da je zadovoljan postignutim napretkom općine s tim da akcenat daljeg rada svakako treba biti na usavršavanju.

U 2015. godini realizovani su svi planirani projekti od izgradnje infrastrukturnih projekata do dovođenja u završnu fazu vodosnabdjevanja naselja Rakovica. Od planirane izgradnje brze saobraćajnice Ilidža- Hrasnica, saobraćajnice uz rijeku Željeznicu, do regulacija korita Bosne, Zujevine, Tilave i Dobrinje, izgradnje gasne mreže u Blažuju. Asfaltirano je oko 70 ulica, a doneseni su i brojni regulacioni planovi kojima bi se ubrzalo rješavanje legalizacije objekata, što su od velikog životnog značaja za stanovnike naše općine. U 2015. stipendirano je 424 učenika i studenta u tri kategorije, od nadaranih, slabijeg imovnog stanja do djece bez oba roditelja, za projekte za mlade dato je 70.000 KM, 450.000 KM za jednokratne novčane pomoći, a isto tako finansirao se i prijevoz učenika sa poteškoćama u kretanju sa pratiocima. Dodjeljena su i značajna finansijska sredstva Domu zdravlja Ilidža, Četvrtoj policijskog upravi, Vatrogasnom društvu "Ilidža", osnovnim školama, vjerskim objektima i dr.

“Interesantno je da Općina podržava odnosno finansira projekte od Škole plivanja za osnovce i to 618 osnovaca, kursa engleskog, pisanje projekata po standardima EU, do posjete Memorijalnom centru Potočari, s ciljem odavanja počasti žrtvama genocida i suosjećanja sa onima koji su izgubili svoje najmilije. Posebna briga, odnosno trajna su šehidske porodice” rekao je načelnik Memić. Kad je riječ o podsticaju poljoprivredi i turizmu izdvojeno je 300.000, za sportske aktivnosti Općina je dala 300.000 KM, za obrazovanje 300.000, a za aktivnosti boračkih udruženja 650.000 KM. I ove godine organizovan je Ilidžanski festival narodne muzike koji je trajao dvije večeri, a za organizaciju i realizaciju angažovana je NTV Hayat.

“Za poboljšanje rada općine zaslužni su i stanovnici Ilidže koji učestvuju u planiranjima i javnim raspravama. Zajedno sa građanima kreiran je i Budžet za 2016. Usvojena je Strategija razvoja i akcioni plan za 2016-2020. Na raspravama za planiranje budžeta smo imali vrlo konstruktivne prijedloge, imali smo puno više pohvala nego kritika, a uvažili smo sve realne zahtjeve građana u ovogodišnji budžet” istako je načelnik Memić, koji je prisustvovao svim raspravama.

Pored nastavka izgradnje infrastrukturnih projekata na Ilidži, čime se općina proširuje i unapređuje, već neko vrijeme planira se realizacija projekta Nova Ilidža.



Projekat Nova Ilidža mogao bi biti jedan od ključnih faktora u razvoju Ilidže i Kantona Sarajevo. Prve aktivnosti trebale bi početi 2016. godine, najavio je načelnik Memić.

“Najbolji prostori za život su kraj rijeka. Ovdje se radi o slobodnom prostoru za koje naše stanovništvo do sada nije bilo zainteresirano i gdje su u prijašnjem periodu Vranica, Hidrogradnja i druge firme eksploatisale šljunak. To nikad nije bilo poljoprivredno zemljište i nije vodozaštitna zona. To je lokacija koja je dobra za građenje” kazao je prvi čovjek i istakao kako u posljednje tri godine intenzivno se radi kako bi se “napravili” Regulatorni planovi.

“Planovima koje mi radimo bili bi obuhvaćeni i djelovi kompletnog naselja u Butmiru na Hipodromu, gdje na državnoj svojini žive doseljenici koje to zemljište nikad nisu kupili niti od države niti od privatnika. Tim RP bila bi obuhvaćena i legalizacija tih kuća bez dozvole” dodao je načelnik.

Kako je rekao, naselje Nova Ilidža planirana da bude moderno naselje za 30 hiljada stanovnika. Za Novu Ilidžu zainteresiran je investitor iz Kuvajta koji je spreman uložiti 60 miliona KM u rješavanje imovinsko-pravnih pitanja i građevinsku parcelu. Investitori koji posjeduju novac jako oprezno dolaze u određene krajeve gdje traže garancije za oblasti u kojima žele ulagati. Ilidža se u tom smislu, nebrojeno puta dokazala kao pouzdan partner.

“Građevinska parcela ima mrežu za kanalizaciju, vodu, plin strujaj, sve će to biti dovedeno prije nego se počne graditi. Nama treba kuvajtski investitor da bi doveo i druge investitore. Interes Općine je da infrastruktura bude adekvatna, da se plaća renta na ono što se gradi, plaća porez i da se zaposli što veći broj ljudi. Kad se počne raditi, imat ćemo zaposlenost, investicije, promet novca, potrošnju i imat ćemo “živu” Ilidžu, Ilidžu koja to zaslužuje” zaključio je načelnik Memić.

Prema njegovim riječima, BiH mora biti otvorena za sve investicije jednako kako bi se sve zajednice razvijale jednako i tako činile čvrst prostor. Kada je riječ o projekta u 2016. godini, prema riječima načelnika Memića, želi se postići da Ilidža bude tehnološki centar, obrazovni, turistički, da zelenilom i vodama bude primjer u svijetu, primjer neuništene sredine, da budemo ekološki pozitivan primjer.

“Mislim da je Ilidža jako pozitivan primjer napredovanja od saobraćaja do osvjetljavanja ulica, na Ilidži ko god dođe vidi promjene. Međutim, ja kao načelnik neću biti zadovoljan dokle god mogu naći bilo kakvu grešku ili bilo šta što bi moglo biti bolje. Imamo veliki stupanj napredovanja, ali kad bismo svi potegli i kad bismo prave vrijednosti znali rangirati, onda bismo imali napredak”, zaključio prvi čovjek Općine, prof. dr. Senaid Memić, koji je i ove godine dobio mnoštvo zahvalnica i nagradi.





Javna rasprava o Nacrtu budžeta za 2016. godine

Općinsko vijeće Ilidža je na 33. redovnoj sjednici održanoj 26. novembra 2015. godine utvrdilo je Nacrt budžeta Općine Ilidža za 2016. godinu u iznosu od 23.300.000 KM i uputilo ga na javnu raspravu po mjesnim zajednicama. Vijeće je utvrdilo i Nacrt Akcionog plana za realizaciju Strategije razvoja općine Ilidža za 2016. godinu koji je usaglašen sa planiranim kapitalnim grantovima po mjesnim zajednicama u Nacrtu budžeta za 2016. godinu, a koji je bio sastavni dio javne rasprave o budžetu. Građani svih 16 mjesnih zajednica u kojima je održana javna rasprava o Nacrtu budžeta i Nacrtu akcionog plana predlagali su prioritete grantova mjesnih zajednica kako bi budžet bio kreiran prema njihovim realnim potrebama. Za kapitalne grantove mjesnim zajednicama u Nacrtu budžeta za 2016. godinu planirano je više od 6.000.000 KM. Prioriteti MZ Butmir su asfaltiranje ulica Butmirska, drugi krak Mlinske, Orlovačka, postavljanje ležećih policajaca u ulicama Butmirska, Izeta Čomare, Ilirska, Butmirskog bataljona, Poligonska, Hipodrom, Aerodromska i 13. juni. Izgradnja kanalizacione mreže u Butmirskoj cesti, nastavak regulacije korita Tilave i Željeznice, izgradnja autobuske okretnice i stajališta, izgradnja sportske plohe u Osmoj OŠ „Amer Čenanović“ su samo neke od potreba građana. MZ Donji Kotorac: rješavanje problema vodosnadbijevanja mjesne zajednice, postavljanje saobraćajnih ogledala na raskršćima, regulacija i čišćenje vodotoka Tilave, izgradnja javne rasvjete u ulici Tuneli. Građani MZ Sokolović-Kolonija tražili su izradu Regulacionog plana Sokolović-Kolonija II, nastavak izgradnje saobraćajnice sa šetalištem od mosta Alija Izetbegović do Ratnog mosta, izgradnju pješačkih staza, postavljanje video nadzora na ključnim raskrsnicama, postavljanje saobraćajnih ogledala i ležećih policajaca, rekonstrukciju i izgradnju kanalizacione mreže, javna rasvjeta, dogradnju Pete osnovne škole, izgradnju dječijih i grališta i sportskih ploha, izgradnju sporsko-rekreacionog centra zatvorenog tipa. U MZ Hrasnica I stanovnicima su u prvom planu postavljanje video nadzora u ulici dr. Halid bega Hrasnice, asfaltiranje ulica Bunica, Put spasa, rekonstrukcija puta i vodosnadbijevanje u naselju Šerifići i Jasen, instaliranje bazne pumpe radi napajanja vodom naselja Lasica, rekonstrukcija platoa ispred Doma kulture, sanacija krovova na objektima kolektivnog stanovanja, čišćenje korita Bunice. Neki od prioriteta za stanovnike Hrasnice II su: izmjene i dopune RP Kovači, rekonstrukcija ulice VečERICA, asfaltiranje ulica Igmanskog bataljona, Halid bega Hrasnice, Himze Mekića, Ribnjača, rekonstrukcija vodovodne mreže u Glavogodini i Stojčevcu, rekonstrukcija kanalizacije u ulicama Halid bega Hrasnice i Stari drum, rekonstrukcija mostova na VečERICI, rekonstrukcija i izgradnja javne rasvjete, dogradnja gasne mreže, izgradnja novih i rekonstrukcija postojećih dječijih igrališta. Građani MZ Ilidža Centar tražili su da se u budžet uvrsti rekonstrukcija ulice Bosanskih gazija, uređenje pješačkih zona u ulicama Mala aleja, Rustempašina i Emira Bogunića Čarlija, postavljanje ležećih policajaca i ogledala, rasvjeta do Stare željezničke stanice i ulici Josipa Slavenskog. Savjet MZ Lužani zaključio je da je u narednoj godini primarno postaviti sigurnosne kamere u ulicama Vinka Šamarića, Krste Hegedušića, Samira Čatovića Kobre, Ramiza Jašara, Četvrte Viteške brigade, Hamze Čelenke, Josipa Pančića i Jahijela Fincija, izgradnja kanalizacije u Vrutcima i izgradnja javnog toaleta kod fijakerskog stajališta. MZ Vreoca predložila je asfaltiranje ulica Blažujski drum

i Lužansko polje, izgradnja pješačkih staza u ulicama Lužansko polje i Vreoca, rješavanje kanalizacionih problema u ulicama Blažujski drum i Lužansko polje, te izgradnja sportske plohe. U MZ Vrelo Bosne prioritet je izgradnja kružnog toka na raskršću puta M-17, Plandište, Vrelo Bosne, zaštita Rimskog mosta, izgradnja pješačke staze Ilidža-Vrelo Bosne i rekonstrukcija ulice Plandište. Za građane MZ Blažuj u 2016. godini potrebno je izraditi projektnu dokumentaciju za izgradnja vodovodne mreže u ulici Gornje Vlakovo i od Plavog granapa do Rakovice, kanalizacije u ulici Vlakovo, mosta na Trnavi, asfaltiranje ulica Remze Ahmetovića, Nadosjek, Plantaže, Kovačevac, Rogačići, saobraćajna signalizacija kod Sedme osnovne škole, izgradnja kišnog kolektora u ulici Rakovička cesta, izgradnja sportskih ploha, dogradnja javne rasvjete. Na zboru građana MZ Rakovica zaključeno je da se u budžet za narednu godinu uvrsti rekonstrukcija ulica Bistrički put, Šamin gaj, Česme, Kakrinjski put, Buhotina i Gornja mahala, propusti u Zeniku, Buhotini i Kakrinjskom putu, asfaltiranje ulice Bistrički put i autobuske stanice na Zelenoj meraji, postavljanje saobraćajne signalizacije, nastavak izgradnje kolektora, druga faza vodovoda, regulacija potoka, rekonstrukcija mosta u ulici Vrela, javna rasvjeta i imenovanje novih ulica i prenumeracija postojećih. MZ Osjek predložila je da se pristupi izradi izmjena i dopuna RP Osjek, izgradnja saobraćajnica od ulaza u naselje prema novom mostu, spoj ulice Nadosjeka sa Drage Filipovića, rekonstrukcija ulica Karamušići, Hendekuša, Rate Dugonjića i Čauš, saobraćajna signalizacija u pojasu Desete osnovne škole, nastavak regulacije korita Zujevine, vodovodna mreža u ulicama Drage Filipovića i Hendekuša, kanalizacija, sanacija mosta na rijeci Bosna, asfaltiranje autobuskih stajališta i izgradnja gasne mreže kraka ulice Osik. U MZ Otes prioritet su: osnovna škola, izlaz na brzu cestu iz pravca Otesa prema Sarajevu, rekonstrukcija Trga Oteškog bataljona, rekonstrukcija i asfaltiranje ulica, izgradnja kanalizacije i vodovodne mreže, regulacija i održavanje korita rijeke Dobrinje, dogradnja javne rasvjete i izgradnja dječijih igrališta. Za stanovnike MZ Stup bitna je: dopuna RP Energinvest, izrada RP Doglodi, izgradnja osnovne škole u naselju Stup II, nastavak izgradnje pješačkih staza, izgradnja kružnog toka na raskrsnici Bojničke sa ulicama Trešnje i Uglješ Uzelca, rekonstrukcija i asfaltiranje ulica, postavljanje horizontalne i vertikalne signalizacije, ležećih policajaca, kanalizacija u ulicama Zabosnice, regulacija vodotoka Dobrinje i Miljacke, izgradnja mosta na rijeci Dobrinji i javna rasvjeta. Savjet MZ Stup II predložio je da se u 2016. godini planira završetak i usvajanje RP Stup-Nukleus, rekonstrukcija ulica Nike Kolumbića, Avde Sućeske, dr. Ševale Zildžić Iblizović, dr. Seida Hukovića, Smaila Balića, Stupske, dijela Kasindolske, krak Džemala Bijedića, Izgradnja biciklističke staze, sanacija kanalizacije u Kasindolskoj, betoniranje i čišćenja korita Dobrinje, izgradnja javne rasvjete u dijelu Kasindolske, izgradnja osnovne škole, dogradnja MZ i proširenje ambulante. MZ Stupsko brdo prioriteti su: asfaltiranje ulica Aleja Bosne Srebrne, Kenana Dubravića i platoa ispred Doma kulture, proširenje ulice dr. Silve Rizvanbegović, postavljanje semafora na raskršću ulica dr. Kasima Begića i Aleje Bosne Srebrne, postavljanje horizontalne i vertikalne signalizacije, izgradnja odvoda oborinskih voda sa saobraćajnica, dogradnja i izgradnja javne rasvjete, renoviranje Doma kulture, izgradnja igrališta i sanacija zgrada kolektivnog stanovanja.



Uručeni ugovori o stipendiranju 309 učenika i studenata

Općinsko vijeće Ilidža je na 33. redovnoj sjednici donijelo Odluku o stipendiranju 309 talentovanih učenika i studenata u školskoj/akademskoj 2015/2016. godini u ukupnom iznosu od 283.620 KM. Odlukom će se stipendirati 106 učenika srednjih škola i 203 studenta. Mjesečni iznos stipendije za učenike i studente prve godine je 78 KM, a za studente od druge do šeste godine kreće se u rasponu od 96 do 120 KM zavisno od postignutog uspjeha u predhodnoj godini. Stipendije će se isplaćivati deset mjeseci. Sredstva dodijeljena stipendijom se ne vraćaju.

Načelnik Općine Ilidža prof. dr. Senaid Memić, 9. novembra 2015. godine u sali Općine Ilidža upriličio je prijem i podjelu ugovora o stipendiranju za talentovane učenike i studente. Ugovore je učenicima i studentima uručio Denis Muhović, pomoćnik načelnika za obrazovanje, kulturu, sport i informisanje.



Prijem za učenike čiji radovi krase kalendar Općine za 2016. godinu

Načelnik Općine Ilidža prof. dr. Senaid Memić 29. decembra 2015. godine ugostio je učenike čiji su likovni radovi štampani na kalendaru Općine Ilidža za 2016. godinu, te njihove nastavnike likovnog obrazovanja. Načelnik Memić je uz čestitke za predstojeće novogodišnje praznike, rekao da nagrade koje su im dodjeljene imaju moralne vrijednosti koje bi im trebale biti podstrek da budu još bolji i uspješniji i da uvijek trebaju doprinosti svojoj lokalnoj zajednici. Općina Ilidža već dugi niz godina finansira izradu kalendara na kojima su predstavljeni najbolje ocijenjeni likovni radovi, a obezbijedene su i novčane nagrade za autore najljepših radova.

Nagrađeni autori likovnih radova su: Elvedin Smajić, učenik devetog razreda Četvrte osnovne škole, Almedina Halilović, učenica osmog razreda Šeste osnovne škole, Edna Čolpa, učenica devetog razreda Prve osnovne škole, Sajra Dedić, učenica šestog razreda Pete osnovne škole, Nejra Šalaka, učenica sedmog razreda Druge osnovne škole, Amina Hadžimešić, učenica osmog razreda Treće osnovne škole, Arman Hanjalić, učenik sedmog razreda Sedme osnovne škole, Adnan Kuljančić učenik devetog razreda Desete, Ammar Omerika učenik sedmog razreda El-manar", Alem Đozo, učenik sedmog razreda Osme osnovne škole" Amer Čenanović", Meliha Čolpa, učenica osmog razreda Devete osnovne škole i Ala Ahmad, učenica drugog razreda Srednje tehničke škole grafičkih tehnologija, dizajna i multimedija. Nagrađeni su i nastavnici Mehdiya Suljević, Amela Kahrman, Salem Hodžić, Selma Pobrić, Alma Žiga, Muhamed Pjevo, Sedina Mulaomerović-Idrizović, Amir Ajkunić, Murid Jahić, Salem Hodžić, Dijana Varnica i Haris Fazlić.

„Ovo je jedan od najljepših dana, dodjela ugovora o stipendiranju mi je najdraža obaveza jer ste vi naš ponos i vaše stipendiranje je investiranje u našu budućnost. Vaša jedina obaveza je da nastavite da učite i ove skromne pare utrošite korisno. Želim vam puno sreće u vašem daljnjem školovanju“, kazao je u svom obraćanju učenicima i studentima načelnik Memić.



Općina Ilidža učestvuje u kupovini vozila za dijalizne bolesnike sa područja BPK -a

Opredjeljeni da zajednički doprinesu humanom i održivom razvoju, da pruže pomoć najranjivijim kategorijama na prostoru jugoistočne BiH 1. decembra 2015. godine, načelnici četiri sarajevske općine i premijeri vlada Bosansko-podrinjskog i Kantona Sarajevo potpisali su sporazum o saradnji, kojim se osigurava nabavka kvalitetnog i prilagođenog transportnog vozila za potrebe dijaliznih bolesnika sa područja BPK.

Sporazum su potpisali premijer BPK Emir Oković, premijer Vlade Kantona Sarajevo Elmedin Konaković, načelnici općina Stari Grad Sarajevo, Centar, Novi Grad, Ilidža i Kantonalna bolnica Goražde.

S obzirom da je u Sarajevu najbliži dijalizni centar, a Kantonalna bolnica Goražde zbog teške nelikvidnosti nije u stanju riješiti problem, ovim sporazumom osigurana je kupovina vozila u iznosu 62.000 KM

Premijer Bosansko-podrinjskog kantona Goražde Emir Oković zahvalio je potpisnicima ovog sporazuma na izraženoj humanosti i razumijevanju, ističući nadu da će saradnja i na drugim projektima biti uspješna.

Načelnik Općine Ilidža prof. dr. Senaid Memić izjavio je da Općina Ilidža učešćem u kupovini ovog vozila dala samo mali doprinos održivom razvoju jugoistočne Bosne, a i pomoć najranjivijim kategorijama, onima koji svakodnevno putuju na relaciji Goražde-Sarajevo-Goražde.





Potpredsjednica FBiH Melika Mahmutbegović u posjeti Ilidži

Potpredsjednica Federacije BiH Melika Mahmutbegović posjetila je 21. decembra 2015. godine uspješnu kompaniju sa područja općine Ilidža, HBRD "Hoteli Terme".

Potpredsjednica Mahmutbegović razgovarala sa direktorom Hotela Terme Alijom Budnjom i načelnikom Općine Ilidža prof. dr. Senaid Memićem.

Direktor Alija Budnjo upoznao ju je sa radom, trenutnim poslovanjem i budućim planovima ove kompanije.

Načelnik Memić je ovom prilikom istakao da mu je zadovoljstvo što ovakvi uspješni poslovni subjekti egzistiraju i posluju na području općine. Načelnik je naglasio da se općina Ilidža pozicionirala na visoko četvrto mjesto po razvoju u FBiH, predstavio razvojne projekte, rekavši da su njegova vrata podjednako otvorena i za građane i privrednike sa područja ove općine.

Konstatovao je kako je potrebno uložiti dodatne napora da bi se ovakve i slične kompanije brže razvijale, a što bi krajnji ishod bio upošljavanje građana općine Ilidža.



Prijem za osvajača bronzane medalje

Anes Čongo, član Karate kluba Champion sa Ilidže na Svjetskom prvenstvu u karateu do 21 godine, koje je održano u Džakarti, u poluteškoj kategoriji osvojio je bronzanu medalju i tako nastavio odličan niz rezultata. Prošlogodišnji je juniorski prvak Evrope i ovogodišnji bronžani sa Evropskog prvenstva do 21 godine. Tim povodom načelnik općine Ilidža prof. dr. Senaid Memić upriličio je, 2. decembra 2015. godine, prijem za ovog mladog i uspješnog sportiste, njegovog trenera Denisa Muhovića i predsjednika kluba Mensura Agovića. Čestitao mu je na postignutom uspjehu i uručio novčanu nagradu u iznosu od 1.000 KM.

„Sport je potreban radi odgoja i zdravlja mladih ljudi, a i radi afirmacije naše države i sredine iz koje potiču. Afirmaciji više doprinese jedan vrhunski sportista sa osvojenom medaljom nego deset turističkih agencija. Mi ćemo i ubuduće podržavati i pratiti ne samo Anesa, već i sve ostale uspješne sportiste iz naše sredine,“ kazao je načelnik Memić.



Prijem za predstavnike RVI FBiH

Povodom održavanja dvanaestih sportskih igara ratnih vojnih invalida FBiH 19. decembra 2015. godine na Ilidži, načelnik ove općine prof. dr. Senaid Memić upriličio je prijem za predsjednike općinskih udruženja invalida sa područja Federacije.

Tom prilikom poželio im je dobrodošlicu na Ilidžu i zaželio im puno uspjeha na takmičenju.

“Sretni smo što smo ugostili ovakvu delegaciju i nadam se da ćete biti zadovoljni i opet se vratiti na Ilidžu. Vaše zasluge su ogromne i vi imate u svim institucijama prioritet, te vaš doprinos ne smije biti nikad omalovažen” dodao je načelnik Memić.



Posjeta predsjednika Saveza ratnih vojnih invalida Federacije Bosne i Hercegovine Općini Ilidža

Predsjednik Saveza invalida Federacije Bosne i Hercegovine Esad Delić posjetio je 28. decembra 2015. godine Općinu Ilidža. Predsjednik Delić upoznao je načelnika prof. dr. Senaida Memića sa aktivnostima Saveza invalida FBiH, sa posebnim akcentom na nedavno održane 12. sportske igre invalida FBiH. Esad Delić se zahvalio općinskom načelniku na prepoznavanju značaja održavanja igara i pokroviteljstvu ovog događaja, te na kontinuiranoj podršci koju Općina Ilidža i načelnik Memić pružaju populaciji sa invaliditetom u FBiH. “Općina Ilidža je primjer lokalne zajednice koja ne zaboravlja svoje građane sa invaliditetom. Ilidža prednjači u materijalnoj i nematerijalnoj podršci koju pruža osobama sa invaliditetom a posebno ratnim vojnim invalidima” istakao je Delić. Općinski načelnik prof. dr. Senaid Memić je ovom prilikom istakao da će Općina Ilidža i dalje biti servis i podrška svim građanima. Zahvalio se gostu na posjeti i odluci da se 12. sportske igre FBiH održe na Ilidži. Obje strane su se usaglasile da će u budućnosti intenzivirati saradnju u svim sferama sa nadom za unaprijeđenje kvaliteta života osoba sa invaliditetom općine Ilidža i FBiH.



Nastavljeni radovi na saobraćajnici Ilidža-Hrasnica

Nastavljeni su radovi na izgradnji saobraćajnice Ilidža-Hrasnica sa tramvajskim pojasom faza 3 B dionica 1 u dužini oko 200 metara na djelu gdje su rješeni imovinsko-pravni odnosi. Izvođač za građevinske radove je firma Bosman d.o.o, a izgradnja javne rasvjete povjerena je firmi Testingelektro d.o.o. U ovoj godini planirano je da se urade svi građevinski radovi, a u narednoj godini asfaltni radovi. Ovdje su urađeni široki iskopi, zamjenjen loš materijal, položena oborinska kanalizacija i geomembrana te izvršen nasip. Trenutno se polažu ivičnjaci i uređuje tramvajski pojas.



Školski bazar u Osmoj osnovnoj školi "Amer Čenanović"

U Osmoj osnovnoj školi "Amer Čenanović" u Butmiru 22. decembra 2015. godine proslavlja se Dan škole. Jedna od aktivnosti povodom tog dana je i školski bazar prodajnog karaktera. Učenici su zajedno sa nastavnicima izložili svoje kreacije koje su radili zajedno sa svojim roditeljima. Jedan dio sredstava ići će u humanitarne svrhe.

"Danas proslavljamo Dan naše škole. Povodom tog za nas značajnog datuma organizovano je više aktivnosti. Nagradili smo i i pobjednike konkursa "Moja škola", gdje su mogli učenici izraziti likovnim radom kako vide školu, te i literarnim radom. Nagradili smo 23 učenika povodom toga takmičenja i druga aktivnost je školski bazar. Naime, proteklih nekoliko mjeseci naši učenici su se upoznali sa jednom od osam kompetencija koje se razvijaju u modernom društvu, a to je poduzetništvo koje je nedostajalo našem obrazovnom sistemu i koje je od prije godinu dana uvedeno. Krana toga rada je danas na Dan škole. Naravno, to nije projekat koji se završava, nego se nastavlja. Cilj bazara je prije svega druženje, razvijanje humanih ljudskih odnosa, razvijanje poduzetničkog duha, razvijanje kreativnosti. Moram priznati da su me prijatno iznenadili i uposlenici i učenici sa svojim idejama. Dio novca koji će se prikupiti bit će iskorišten u humanitarne svrhe. Imamo učenika koji boluju od težih bolesti i dio ćemo njima uručiti, a dio u poboljšanje uslova rada" kazao nam je direktor Vahid Čustović. Jedna od učiteljica ove škole, razreda II-2, Anela Kamerić zahvalila je svim učenicima i roditeljima na učešću u ovom bazaru. "Pokušavamo, da ove naše male ljude izvedemo na otvoreni put života, ni malo lagan. Pokušavamo, da im teško bude manje teško, da im lijepo bude ljepše i nadam se da uspjevamo jer svoj rad radimo s ljubavlju. Naša nagrada su osmjesi i iskrena ljubav ovih mališana. Ponosna sam na moje učenike, jer su izrazili razumijevanje, humanost, solidarnost, a sve timski" rekla nam je učiteljica Kamerić. U poslijepodnevним satima učenici su u večernjim satima organizovali školsku priredbu za svoje roditelje i goste.

Zamjenjena vanjska stolarija u Drugoj osnovnoj školi

U Drugoj osnovnoj školi u Hrasnici završeni su radovi zamjene vanjske stolarije učioničkog bloka. Tim povodom 18. decembra 2015. godine svečano su učenici i kolektiv ove škole obilježili završetak radova. Gosti, investitori iz Općine Ilidža, GIZ-a, Saveza općina i gradova FBiH, izrazili su zadovoljstvo uspješno realizovanim projektom vidjevi mališane koji sada rade i uče u toplim prostorijama.

Načelnik Općine Ilidža prof. dr. Senaid Memić poželio je učenicima puno uspjeha u školskim klupama ističući da su djeca budućnost u koju vrijedi i mora se ulagati. Zamjena vanjske stolarije učioničkog bloka realizovana je u okviru projekta "Energetska efikasnost u udruženjima općina."



Crveni križ obilježio Međunarodni dan migranata

U svijetu 18. decembar se obilježava kao Međunarodni dan migranata. Na ovaj dan se posebno želi skrenuti pažnja na ovu populaciju u društvu, na probleme i poteškoće s kojima se migranti susreću, s akcentom na izbjegličku situaciju u svijetu danas.

Tim povodom volonteri Crvenog križa vršili su anketu među građanima Ilidže kako bi stekli uvid u svijest građana o temi migracija. Također, su dijelili čaj prolaznicima kako bi se mogli okrijepiti dok popunjavaju anketu na hladnom vremenu.





Učenci Devete osnovne škole pobijedili na federalnom takmičenju

Ekipa Devete osnovne škole pobjednik je federalnog takmičenja osnovaca pod nazivom "Upozoravanje na opasnosti od mina". Takmičenje je organizovao Crveni križ Federacije BiH, a učestvovalo je osam ekipa, pobjednika kantonalnih takmičenja. Učenci su se takmičili u rješavanju zadataka koji su se odnosili na poznavanje mina i neeksplozivnih ubojitih sredstava, a pobjedničku ekipu činili su učenici Erna Bubić, Saida Hajrović i Anela Javorovac. Za takmičenje ih je pripremala Hikmeta Avdić i Erna Bubić.



Obilježen Dan borbe protiv AIDS-a

U okviru 1. decembra, Međunarodnog dana borbe protiv AIDS-a, aktivisti Udruženja Partnerstvo za zdravlje, pokrenulo je inicijativu da se ovaj dan obilježi zajednički nastupom organizacija koje djeluju na području općine Ilidža. Inicijativu su prihvatila Mreža vršnjačkih edukatora Y-Peer, Institut za razvoj mladih Kult, Vijeće mladih Općine Ilidža i Zavod za javno zdravlje Kantona Sarajevo koji su zajednički nizom manifestacija obilježili ovaj značajan datum. Organizovani su info štandovi na kojima su dijeljeni edukativni materijali o reproduktivnom zdravlju, HIV-u i AIDS-u kao i kondomi kao jedina zaštita od spolno prenosivih bolesti, a materijali su distribuirani i po poštanskim sandučićima građana i mjestima gdje se mladi okupljaju. Pored ove aktivnosti organizovana je radionica za učenicke srednjih škola sa područja općine Ilidža na kojoj su učili o HIV-u i AIDS-u kao i drugim spolno prenosivim bolestima, te okrugli sto za predstavnike škola o značaju edukacije i drugih preventivnih mjera u cilju zaštite reproduktivnog zdravlja.

Crveni križ u okviru svoje misije ima zadatak promocije zdravlja te podizanja svijesti o različitim zdravstvenim problemima i oboljenjima današnjice te u okviru toga provode i kampanju podizanja svijesti o AIDS - u. Tako 1. decembra u srednjim školama na području Ilidže njihovi peer edukatori održali predavanja na temu prevencije i zaštite od HIV virusa, njegovim globalnim parametrima, te AIDS - u - liječenju i životu sa ovom bolešću. Populacija od posebnog značaja kojoj je potrebno prenijeti znanja o ovoj temi su upravo adolescenti, učenici srednjih škola, te su volonteri putem vršnjačke edukacije pokušali barem odškrinuti vrata destigmatizacije i skinuti epitet "tabua" ovoj temi. Pored ovoga, u popodnevним satima, od 14 do 16 sati na autobusnom terminalu Ilidža održana je kampanja podizanja svijesti o ovoj bolesti. Na pultu koji je postavljen, volonteri su dijelili promotivni materijal, prezervative i red ribon - crvene mašnice, a građani su se mogli fotografisati sa pripremljenim okvirom u cilju podrške kampanji. Odziv građana, prvenstveno mladih je bio veliki.

Općina podržala kurs engleskog jezika

U organizaciji Udruženja "No limit" u decembru 2015. godine završen je Projekat "Kurs engleskog jezika". Projekat učenja engleskog jezika finansijski je podržala Općina Ilidža, na kojem je učestvovalo 22 mladih sa područja naše općine. Cilj projekta je bio da mladi savladaju osnove engleskog jezika i na taj način steknu diplome i certifikate koji trebaju da im olakšaju u budućem životu. Učesnici su projekat ocijenili uspješnim i predložili da se ponovi i proširi. Edukator je bio Edin Spjodić mladi svršnik engleskog jezika i književnosti.



Podjeljene maske građanima

Zbog velike zagađenosti zraka u Sarajevu, 24. decembra 2015. godine na autobusnom terminalu na Ilidži aktivisti ekološkog udruženja "Aleja", dijelili su građanima zaštitne maske, te na ovaj način dali svoj doprinos u zaštiti zdravlja svojih sugrađana.

Iz ovog Udruženja apeluju i poručuju sugrađanima da smanje boravak na otvorenom, te da koriste zaštitne maske ili na drugi način da zaštite svoje zdravlje.





Realizovan projekat “Street basket Ilidža 2015”



Košarkaški klub “Impuls” je 19. decembra 2015. godine realizovao je projekat “Street basket Ilidža 2015”, pod pokroviteljstvom Općine Ilidža.

Na takmičenju su učestvovali učenici osam osnovnih škola, odnosno oko 60 učenika. Prvo mjesto zauzela je ekipa Prve

osnovne škole Ilidža, drugo Druge osnovne škole Hrasnica, a treće Osme osnovne škole “Amer Čenanović” Butmir.

Nagrade su uručene svim učesnicima za prva tri mjesta, pehari i medalje za svu djecu i za fair play ekipe je uručen pehar.



Turnir u kuglanju ilidžanskih osnovaca

Sportsko-rekreacijski klub „KRIS - KROS“ realizovao je još jedan projekat finansiran iz budžeta Općine Ilidža, „Turnir u kuglanju“, koji je održan 10. decembra 2015. godine u kuglani hotela „HOLLYWOOD“. Na turniru su učestvovali učenici i učenice osnovnih škola sa područja općine Ilidža. Prvo mjesto za djevojčica osvojila je Adna Ožegović iz Desete osnovne škole, drugo Emina Hamidović iz osnovne škole El-Manar i treće Emina Zolota iz Osme osnovne škole „Amer Čenanović“. Kod dječaka prvo mjesto osvojio je Tarik Pirija iz Prve osnovne škole, drugo Harun Mulaomerović iz Prve i treće Kenan Mirvić iz Devete osnovne škole. Pobjednicima su dodijeljene diplome i medalje.

Podjeljeni novogodišnji paketići za djecu RVI

Udruženje ratnih vojnih invalida općine Ilidža 29. decembra 2015. godine realizovalo je projekat podjele novogodišnjih paketića za djecu ratnih vojnih invalida do deset godina.

“Unatoč krizi koja je prisutna u našoj zemlji ne možemo i nećemo odustati da bar na trenutak obradujemo naše male mališane a samim tim i roditelje koji su dali svoje zdravlje braneći našu državu, kazao je predsjednik udruženja Esad Deliđ, koji se i tom prilikom zahvalio na odzivu i ukazanom povjerenju, te naglasio da će Udruženje i narednih godina nastaviti sa ovim projektom. Udruženje je ovim projektom obezbjedilo 155 paketića i time obuhvatilo svu djecu iz svog članstva.



Podjeljeno 30 paketića za djecu sa posebnim potrebama

Povodom novogodišnjih praznika u sali u Maloj aleji bb, u Organizaciji Udruženja “Zlatna ruka” upriličena je podjela novogodišnjih paketića. Tom prilikom paketiće je dobilo 30 djece.

Novogodišnja predstava “Čarobnjak iz Oza”

U Multimedijalnom centru Ilidža 30. decembra 2015. godine upriličena je uz prigodnu predstavu i druženje podjela paketića za djecu uposlenika Općine Ilidža. Institut za razvoj mladih KULT i Obrazovno-raznodni centar za mlade SPAJALICA, ove godine su organizirali novogodišnji program za djecu i mlade, te nezaobilaznu posjetu Djeda Mraza i podjelu paketića. Ove godine se za predstavu tražilo mjesto više. Prepuna sala Multimedijalnog centra na Ilidži je odzvanjala muzikom, plesom, pjesmom i smijehom djece. Predstava Čarobnjak iz Oza je otvorila novogodišnji program, zatim je uslijedio nastup malih balerina iz škole baleta Spajalica te pjesmice polaznika Škole prijateljstva i na kraju predstava volontera SPAJALICE koji su najzaslužniji za organizaciju čitavog eventa.

Večer je protekla u savršenom redu iako su oni najmlađi sa velikim nestrpljenjem dočekali svoje paketiće, ali ipak zadovoljni i sretni otišli kući. Za djecu uposlenika Općine i članova udruženja podjeljeno je 77 paketića. Paketiće je finansirala Sindikalna organizacija Općine Ilidža.

